

U akciji Kamagra uhapšen uposlenik UIO

SIPA uhapsila dvije osobe osumnjičene za nedopuštenu trgovinu lijekovima, među kojima je i uposlenik Uprave za indirektno oporezivanje BiH.



Kamagra je prošle godine nakon pisanja CIN-a povučena iz prodaje u pojedinim apotekama

(Foto: CIN)

Piše: **Centar za istraživačko novinarstvo**

U akciji „Kamagra“ Državna agencija za istrage i zaštitu (SIPA) je u Banjaluci uhapsila dvije osobe osumnjičene za organizovani kriminal, nedopuštenu trgovinu, stavljanje u promet proizvoda štetnih za liječenje i zloupotrebu položaja ili ovlaštenja.

Kako je za Centar za istraživačko novinarstvo (CIN) rekla Kristina Jozić, glasnogovornica SIPA-e, jedan od uhapšenih je uposlenik Uprave za indirektno oporezivanje (UIO) Bosne i Hercegovina.

Akciji je, kako navode u SIPA-i, prethodila višemjesečna istraga u kojoj je otkrivena nedopuštena trgovina lijekovima iz Indije i Srbije u BiH.

Kako je CIN ranije pisao, granične službe BiH i Srbije su proteklih pet godina sporadično otkrivale slučajeve šverca lijekovima, među kojima su najčešći bili preparati za potenciju *Kamagra*. UIO je u aprilu 2013., na Graničnom prijelazu Pavlovića most kod Bijeljine, zaplijenila 840 kutija *Kamagre* koje su bile namijenjene za daljnju preprodaju.

Kamagra je preparat za podizanje seksualne potencije muškarca koji proizvodi farmaceutska kuća *Ajanta Pharma Limited* iz Indije, a nije registrovan, odnosno ne može se prodavati ni u BiH ni u Srbiji.

CIN je u septembru prošle godine objavio [istraživanje](#) u kojem je otkrio da se *Kamagra* može kupiti u apotekama u Bijeljini i Sarajevu, te na pijaci u Tuzli. Nakon pisanja CIN-a, Agencija za lijekove i medicinska sredstva BiH je obavijestila entitetske inspekcije i *Kamagra* je [povučena iz prodaje](#).

Novinari su otkrili da je *Kamagra* u neke apoteke stigla preko veleprometnika *Krajinalijek* iz Banje Luke. Inspektori Agencije za lijekove su izvršili kontrolu u *Krajinalijeku*, te, kako su rekli za CIN, izrekli odgovarajuće prekršajne sankcije.

Prema Zakonu o lijekovima BiH, kazna za proizvođače i veletrgovce lijekova za prodaju neregistrovanog lijeka je od 30.000 do 100.000 KM, a za pojedince do 10.000 KM.

Objavljeno 28. 3. 2014.